

覆陳借用洋款摺

奏為遵

旨覆陳

聖鑒事竊臣於光緒二年二月十七日承准

軍機大臣 字寄二月初七日奉

上諭

沈葆楨等奏籌議財外餉需礙難借用洋款暨江蘇擬力籌西征協餉各摺片據該督臣等奏

海關部庫均受其害應於各省關稅緩就急並江蘇竭力籌措等語所陳各屬實在情形西征餉需設

自當速籌籌畫於國計軍餉兩無妨礙方為可濟應如何斟酌盡善之處著左宗棠等妥籌具奏

原摺片著鈔給左宗棠閱看沈葆楨所請將湖北湖南協濟江防銀兩移解江蘇等語著照所請辦理

奏到日再行降

旨欽此跪誦

諭旨並細閱原奏摺片具悉江蘇撫臣竭力籌措兩江防軍用度如

濟江防銀兩撥濟西征深維大局苦心微臣身值時艱一籌莫展徒煩遑省疆臣代行籌策誠恐如豈

敢乞餘不足又顧之他益增歉仄願事有萬不得已者不敢自安緘默謹就愚見為 皇上陳之臣之

奏借洋款原因各省關應協款項積欠成鉅陳陳相因馴至洋防議起照常年又減至一半以外頻催閩

應計無復之萬不得已而有此請非不知借用洋款非正辦也沈葆楨與臣素相契合其清強有執臣常

自媿不如原奏義正詞嚴復舉兩湖應解江防銀兩移撥西征亦實情理兩得然其代為臣謀究不如臣

之自為謀也姑就其論國債一說詳之泰西各國經常用度原有定數其格外之費均由其國富商勒度

承認自出資本經營由公司抽收課稅以裕國用如開鑛治水諸大工作原奏所謂輕利博重利者是也

下非放債上非借債不得概以國債名之問有由其官中授意與辦如英吉利開印度通緬達滇邊山路

圖就近銷售鴉片則官主謀而商應募不在此例至各國用兵除報怨雪仇外均為其國商賈爭利起見

兵費例由紳士商民認定計期取償於官則為國債非臣臆說也原奏英美有國債不失為富強西班牙

土耳其以債傾國日本蹈其覆轍而謂英美舉債於本國猶是富藏於民非西班牙等國輸息鄰封之比

是矣至論各國舉債攸殊效有同異之分尚非探原之論夫英美富強甲於海國由來已久兵費借其本國之債不待求助鄰封自然之理西班牙不善經營土耳其耽吸鴉片日本因欲去其大將軍之逼舉國以奉西人割地以給俄人出其額征為質各國衰亡之徵由其自致若謂借本國之債者必富且強借鄰封之債者自貽困蹙而引之為借用各國洋款之戒非定論也就日本借用洋款而言因其國有逞志朝鮮取償國債之心洋人遂以此蠱之陰為各國外海總埠頭之計日本未嘗不知祗緣既與定議不敢復有異同隱忍遷就勉而出此非所論於西征一局夫西征用兵以復舊疆為義非有爭奪之心借千萬鉅款濟目前急需可免懸軍待餉十年計息所耗雖多而借本於前得以迅赴戎機事之應變者可以速辦如減撤防軍以省糜費籌設新制以濬利源隨時隨處加意收束計十年中所耗之息可取償十年之中非日本之尋釁舉兵與洋人共利可比至西班牙舉債經商本奸商騙賴之類也土耳其舉債傾國本統袴敗家之類也烏可同年而語哉以海軍按年應協之餉了還按年應還陝甘借款本息不必得半而足是大有造於塞防而無所損於洋防原奏謂洋款取償於海關海關仍待濟於各省各省僅籌協餉已催解不前令兼籌協餉之息何能如期以應查借用洋款向章海關出票定數督撫鈐印歸款此次辦法自亦如此各省關印票之數原劃定各省關應協之款並非於協餉外兼籌協餉之息事理著明非可隱占其與解部之款本不相涉原奏所稱海關病部庫病者其原在各省協餉之愆期現奉

諭旨自光緒二

年起如不能照原撥添撥數目解至八成以上將該藩司監督照貽誤京餉例由該部指名嚴參此後海關自可不至代人受過平心而言借用洋款實於中國有益無損泰西各國興廢存亡並非因借債與不借債之故其理易明即以現在局勢言之臣非先後借用洋款則此軍不能延至今日上年李鴻章有二千萬待借之奏即沈葆楨辦理台防亦曾借用洋款六百萬兩嗣因倭事速定部議停止四百萬今倭事息而西事殷重理舊說似非可應請

旨勅下兩江督臣即代臣借洋款四百萬兩迅解來甘臣得此

欸清還新借陝鄂上海各款一百二十萬兩尚可餘二百數十萬兩暫資敷衍如各省關自本年正月

協款能解足八成以上臣軍有的餉源源而來苟可設法騰挪何肯以催餉頻煩自取憎厭倘各省關未能如數報解微臣計無復之洋款既不能借則非息借華商巨款不可而息借華商巨款若不謀之兩江則又無從著想此臣之苦衷所不得不預為陳明者也江蘇協款每年除劃抵前借洋款本息外僅應補解二十餘萬兩蘇省雖九竭力籌措為數非多而協款外尚有應解老湘營每月四萬五千兩一款甬解至上年七月計截至今正已欠解六個月沈葆楨雖將湖北欠解江防之十二萬兩湖南欠解江防之八萬兩撥解西征然以之抵老湘營月餉截至今正尚欠七萬兩原奏穆圖善月餉一萬兩關內外各軍均由臣酌量統收分撥意在清眉目一事權亦俾臣得稍資周轉耳然自統收分解之議起臣軍之餉正因墊解過多受其累疊經奏明有案何能稍資周轉乎總計沿海各省關協甘之款山東為數少而報解勤浙江則更不遺餘力其欠解之最多者閩為最粵次之粵東瑞麟故後閩自英桂內召後解款日漸減少閩之積欠則已至三百餘萬矣合無仰懇 天恩飭下兩廣督臣廣東撫臣福建督撫臣盡力籌維務將本年應協甘款如數迅解共支危局毋推以八成自限則猶隴餉之一大宗也臣拜摺即行馬步共二十九營每營僅攜四個月鹽菜馬乾就道幸各處糧料水草均已預備師行無阻當合營起行適奉諭旨准借洋款士氣甚奮閱沈葆楨原奏則未敢宣布也謹一併覆陳伏乞 訓示謹 奏光緒二年二月二十一日 皇太后 皇上聖鑒

會報抵蘭出塞日期摺

奏為會報抵蘭出塞日期恭摺仰祈 聖鑒事竊臣宗棠於上年十二月十四日附 奏擬俟臣劉典到蘭將留防善後諸務面為商定即啟行而西臣劉典十一月二十日由湘啟行沿途風水阻滯樊城登陸入秦度隴雨雪載途感受寒疾仍按程行走二月初八日抵蘭連日商榷軍事及善後未盡事宜均有端緒正值河冰欲泮橋難遽架遲至二十一日臣宗棠始克率親兵十哨白馬氏練丁一營馬隊四起登程前進所部前隊二十四營則已於正月二十八二月初二初八十五等日陸續由涼州拔行今至肅州取

齊分起次第繼進大約由肅州以西按台站行走中途無須停頓由巴里坤達古城十一站應察看地形
留駐數營防賊旁竄抵古城後須軍糧取齊乃可趣戰臣宗棠所帶親兵馬步各營暫駐肅州俟前路糧
料運至古城後路肅州安西哈密各有儲積乃可前進其前路進止機宜已面授總理行營營務處西甯
道劉錦棠令其相機辦理不為遙制俄糧之運古城者截至四月可四百八十餘萬斤僅敷全順全軍馬
步之需繼進之軍所需糧料除官私馱驟駝隻裝運軍士自行裹帶外餘均取給哈密巴里坤哈密巴里
坤糧源自甘肅肅州安西而來巴里坤糧源自歸化包頭寧夏而來遠者五千餘里近者三千數百里截
至四月巴里坤存糧可六百餘萬兩斤安西哈密之糧運至古城者可四百餘萬斤存儲待運者尚千萬
斤然勞費已不勝計矣其巴里坤有數徑可達安西不復經由哈密已飭記名提督徐占彪俟臣宗棠到
肅後帶所部馬步四營駐之哈密則有張曜一軍馬步十二營宋慶所留步隊八百人擇要扼守以防吐
魯番東犯之賊如此庶後路常通糧運不匱乃可言勁氣直達也臣等連日籌商關內外全局布置大概
意見脗合彼此互相最勉冀毋負 聖明委任之意征防各軍和敢如常士氣甚奮尚堪仰慰 慈懷謹
一併陳明伏乞 皇太后 皇上聖鑒訓示謹 奏光緒二年二月二十一日

附陳新疆賊勢片

再烏魯木齊踞逆本地土回居多逆首白彥虎所帶陝回及甘肅從逆之回踞紅廟子古牧地瑪納斯等
處而皆與南路踞逆回酋怕夏通怕夏即教罕部安集延回酋和碩伯克也怕夏當即怕克轉音俄羅斯
既滅教罕踞其塔什干都城教罕所部安集延獨免同治四年乘回部之變入踞南路喀什噶爾及各回
城於是土魯番闔展以西土回皆附之怕夏能以詐力制其眾又從印度多購西洋鎗礮勢益猖獗陝甘
竄踞之逆及本地土回均倚之為重然不敢顯然與俄羅斯較是俄兵之強可知俄人頗言其狡悍異於
諸賊以教罕向未用西洋鎗礮安集延多洋鎗隊而怕夏又能用其眾是安集延之強亦可知官軍出塞
自宜先剿北路烏魯木齊各處之賊而後加兵南路當北路進兵時安集延或悉其醜類與陝甘竄逆及

土回合勢死抗官軍當有數大惡仗如天之福事機順利白逆殲除安集延之悍賊亦多就戮由此而下兵南路其勢較易是致力於北而收功於南也若北路軍威未至而賊先圖自固不敢互相援應但作守局以老我師則曠日持久亦在意中外間議論頗謂軍臨前敵陝甘竄回必有倒戈之事臣不敢信其誠然即令誠然白逆必遁竄入南路安集延未經重創其狡焉思逞之志不忘如其併力穩抗自可獎率師徒為一了百了之計倘詭詞乞撫仍思踞我腴疆或兵至則逃妄擬乘間竊逞為死友復然之計則新疆隱患方殷豈可不預為之所議者但以陝甘竄回及新疆各城為慮不復知有安集延竄踞南路之事或以為易或以為難或以為事可緩圖或以為功可速就或主撤兵節餉之議或並為難得易失之談辯說紛紜橫議岐出揅其命意皆因裨益洋防起見豈真由衷之談哉臣本一介書生辱蒙 兩朝殊恩高位顯爵出自 逾格鴻慈久為平生夢想所不到豈愚立功邊域覲望 恩施況臣年已六十有五正苦日暮途長乃不自忖量妄引邊荒艱鉅為己任雖至愚極陋亦不出此而事願有萬不容已者烏魯木齊各城不克無總要之處可以安兵烏魯木齊各城縱克重兵鉅餉費將安出康熙雍正 兩朝為之吁食者準部也乾隆中準部既克續平回部始於各城分設軍府然後九邊靖謐者百數十年是則拓邊境腴疆以養兵之成效也今雖時易世殊不必盡遵古制而伊犁為俄人所據喀什噶爾各城為安集延所據事平後應如何布置尚費綢繆若此時即便置之不問似後患環生不免日蹙百里之慮區區愚忱竊有不

敢不盡者謹將新疆賊勢大概一併陳明伏乞 聖鑒訓示謹 奏光緒二年二月二十一日

軍機大臣 字寄光緒二年三月初一日奉

上諭

左宗棠劉典奏會報抵蘭出塞日期左宗棠新疆賊勢大概情形請籌洋款四百萬兩丁日昌奏洋債不宜多借各摺片覽奏均悉劉典現已馳抵蘭州所有關內關外各事宜左宗棠業已統籌全局布置妥協督率馬步各營分起西進為規復新疆各城之計足見公忠體國力任其難該督抵肅州後應如何次第進兵之處均著隨時相機籌辦朝廷不為遙制所陳新疆賊勢軍情瞭如指掌惟期節節掃蕩收復烏魯

木齊吐魯番以次廓清南北兩路奠定西陲為一勞永逸之舉後路催運糧餉軍火關繫緊要劉典當隨時籌畫以資接濟左宗棠出師塞外必須士飽馬騰方足以壯軍威而張撻伐各營將士踴躍前驅尤深廩念各省協解西征餉銀未能足數致有積欠口糧此次遠道進兵糧餉必須充裕左宗棠前議借洋款一千萬兩以備應用因耗息過多現請減借用四百萬兩係為節省經費顧全大局起見惟現當大舉深入酌發欠餉豫備行糧需款甚鉅恐不足以資周轉該督既以肅清西路目任何惜籌備鉅款俾敷應用以竟全功加恩著於戶部庫存四成洋稅項下撥給銀二百萬兩並准其借用洋款五百萬兩各省應解西征協餉提前撥解三百萬兩以足一千萬兩之數該督得此鉅款務將新疆軍務早日蒞事迅奏膚功國家經費有常似此竭力湊撥可一而不可再萬不可虛糜帑項日久無功洋款如何籌借著左宗棠自行酌度奏明辦理撥用四成洋稅二百萬兩如何解還部庫著戶部籌撥歸款所借洋款著仍遵前旨在各省應協西征新餉內分年撥還各省應解西征協餉現令提前趕解三百萬兩並著戶部酌量指提母任延宕其餘應解西征協餉仍著各該將軍督撫遵前旨嚴飭各該藩司監督儘力報解毋得以八成自限左宗棠奏閩粵欠解較多請飭將本年應協廿款如數迅解等語著該督撫遵照辦理籌借洋款本係萬不得已之舉因西征大局所關是以允借五百萬兩俾利軍行丁日昌所陳變通西餉辦法亦有所見並先行湊齊六十萬兩滙由沈葆楨處彙解具見急公嗣後應解左宗棠協餉仍著會商文煜李鶴年源源籌辦以應急需將此由六百里諭知左宗棠劉典文煜沈葆楨李鶴年劉坤一翁同龢吳元烜裕祿劉秉璋楊昌濬丁日昌丁寶楨鮑源深李慶翱譚鍾麟王文韶張兆棟並傳諭文格李文敏知之欽此

會奏刊用木質關防一切事件分別辦理片

再臣典抵蘭後旋經臣宗棠刻

欽命幫辦陝甘軍務候補三品京堂二品頂戴雲騎尉世職阿爾剛

阿巴圖魯木質關防一顆咨送臣典啟用至臣宗棠出省後所有總督衙門一切例案已委布政使崇保代折代行其考拔武弁千總把總各缺向由提鎮揀選送蘭州考拔中備以上委署請補各缺向由督臣

酌定茲臣宗棠督師出塞相距日遠所有武職委署請補及拔補升缺均商由臣典就近辦理以免稽延而示體恤至雨澤糧價例由藩司核明詳報督臣按月具奏茲臣宗棠遠出若循例辦理必致愆期是以商之臣典凡循例月摺及關內軍務糧餉一切事宜均由臣典核定借用藩司印信隨時會同專摺具奏惟文職委署請補員缺則由藩臬兩司詳報行營由臣宗棠辦理師行愈遠轉饋愈艱餉糧極關緊要而烏魯木齊以東皆陝甘總督所轄所有陝甘總督關防應由臣宗棠隨帶西征者一期呼應靈通一期軍餉與糧軍權歸一便於騰挪周轉也謹一併附片陳明伏乞
聖鑒謹奏
光緒二年二月二十一日

王加敏懇 予獎叙片

再臣於同治十年彙案保獎蕩平金積堡賊巢甯靈清台局出力各員內二品頂戴湖南補用道王加敏附片奏 賞給從一品封典奉 旨允准嗣經部議核與章程不符行令另行奏請前來臣維王加敏

於咸豐年間以湖南候補道員辦理本省糧台後經臣奏調赴浙督辦台務同治五年臣奉 命西征復

令駐鄂總理陝甘後路糧台事無鉅細均必躬親歷無貽誤不特臣軍倚賴最深亦為各省大吏所共信與臣共事先後二十餘年深悉其樸幹廉勤才品兼擅實一時之選而歷次保案從未籲請 優獎雖雅

知該員官情素淡不以榮進為懷亦正以後路台務緊要一時難負替人勉事竊切得資贊助此次開隴

肅清應加甄敘合之前此金積堡案部議另行奏請應一併籲懇 天恩俯准將二品頂戴湖南補用道

王加敏交軍機處存記遇有湖北道員缺請 旨簡放俾臣軍餉需務藉資料理而鄂省得一能事監

司亦有裨益是否如斯謹附片具陳伏乞 聖鑒訓示謹 奏
光緒二年二月二十一日

軍機大臣奉 旨王加敏著加恩賞給從一品封典欽此

馳抵肅州遣軍出關摺

奏為 微臣 馳抵肅州資遣馬步各軍分起出關恭摺 馳報仰祈 聖鑒事竊臣於二月二十一日由蘭州

拜摺啟行沿途整隊前進三月十三日駐軍肅州總理行營營務三品卿銜二品頂帶法福靈阿巴圖魯劉錦棠先率馬步全軍駐於城北記名提督新授漢中鎮總兵譚上連領所部先進記名提督甯夏鎮總兵譚拔萃繼之記名提督陝甘鎮總兵余虎恩又繼之四月初三日劉錦棠親率漢回馬步各軍橋旂啟行擬抵安西後分起以次前進蓋師過哈密行戈壁中糧糗可裹帶以趨柴新草束可儲峙以待惟水泉缺乏雖多方疏濬不能供千人百騎一日之需非分起續進不可也見據譚上連稟已抵巴里坤譚拔萃已近哈密余虎恩已過安西臣因古城所收俄糧尚祇四批金順絨續頻來需糧甚急非得三百六十萬斤不能見新臣允於巴里坤取糧百萬斤哈密取糧二百六十萬斤以供軍食而古城所收俄糧四批亦概付之計新糧可資接續矣惟劉錦棠馬步二十五營所需軍食本指巴哈存糧轉運古城茲兩處已分濟金順雖餘糧尚多而一時運腳難期周轉缺乏堪虞除前雇商駝萬隻由安西哈密徑運古城外復由肅州儘官民商三項車輛裝糧料運古城以廣儲峙幸歸化包頭甯夏商駝之運巴里坤者踴躍如常存糧尙敷轉饋劉錦棠到哈密後計古城儲峙稍充即率各營長驅大進直搗賊巢戰事當在五月閏月之際屆時節近秋初新穀遍野有糧可因轉戰而前士氣自倍臣與劉錦棠熟商進兵機宜以先遲後速為穩者此也幸蘭州涼甘各屬俱需春霖肅州安西於三月二十一二等日同霑優渥農祥有兆豐稔可期如天之福關內外幸獲豐年則就近採運供支勞費亦可漸圖撙節而西征大局庶幾速振矣所有分起出關事宜謹據實陳明伏乞

皇太后

皇上聖鑒訓示謹

奏光緒二年四月十三日

進攻瑪納斯大概情形片

再臣於本年三月二十五日在肅州行營准金順咨稱統領吉江馬隊涼州副都統額爾慶額咨報本年正月間聞白逆有糾合瑪納斯南北兩城踞回竄擾糧運之事因與督帶定營馬隊總兵馮桂增會商振武統領參將徐學功各率所部會師於大河廠相機進取瑪納斯城以期扼險防竄善商既定額爾慶額與馮桂增即於正月二十七日率隊先行徐學功繼之二十八日額馮兩軍營抵大河廠因待徐軍未至

遂於是夜先進二十九日寅刻徑薄瑪納斯北城馮桂增等改騎為步由城西北兩面猛登斃守城逆回二十餘名開門延納官軍城中踞賊驚起拒敵馮桂增率部巷戰額爾慶額麾軍繼進鏖戰踰時斃賊三百餘名並陣斃兇悍逆目翟老四噶一兩名餘賊却聚城東隅天色已明南城踞回見北城危急連施大礮官軍少卻南城賊馬步千餘乘勢蜂擁而至北城東隅踞賊復出死拒馮桂增縱橫馳突身負數創額爾慶額亦奮身抵敵背足受傷俱裹創力戰馮桂增復受傷墜馬賊眾猛撲昇擁入城額爾慶額憤極陷陣斃賊十餘名因弁勇傷亡已多勢不能支遂即收隊回防徐學功於是日行距瑪納斯城十餘里地方見事已敗亦即撤回額軍陣亡官兵共計五十五名馮桂增所部暫飭都司馮以和接帶整理又據徐學功報戰事失利略同惟所稱未進之先額爾慶額等與徐學功原議於正月二十九日由大河廠會師進取議定後額爾慶額馮桂增兩軍先期進取徐軍屆期進發行距瑪納斯城十餘里地方遇兵勇紛退額爾慶額帶傷回防徐學功率所部前救護敗殘兵勇收隊回營沿途探詢額軍官兵約陣亡三十餘員名馮軍弁勇約陣亡一百六七十名額爾慶額挑帶駐防沙灣土勇約陣亡十餘名金順以徐學功救援不力先摘其翎頂額爾慶額進志過銳亦未便免議等因咨臣核 奏前來續接額爾慶額續牘深以徐學功進兵遲緩為言並稱前報陣亡官兵五十五員名內有被甲金有一名逃回實弁陣亡五十四名其馮軍陣亡弁勇據營員彙報共計一百九十一名與徐學功所報兩軍陣亡人數亦有未符臣維襲攻堅城本難得手而馬隊黑夜撲城尤為希見之事額爾慶額馮桂增久歷行間不應冒昧至此此致挫之由實因輕進貪功咎由自取徐學功行近瑪納斯地方知前敵已敗不即麾軍馳援雖屬無可辭咎惟據彼此牘報情形而言額爾慶額馮桂增原約二十九日進攻並未明定時刻嗣兩營於先夕寅刻麾馬隊前進自非徐學功所能預知且額爾慶額於襲攻瑪納斯城賊巢事前並未咨商金順事後緘牘遲至兩月始抵肅州不但馮桂增存亡未悉即所部金有一名敗後逃回當時亦未及詳關外軍務文報多不足憑臣未敢輕率請 旨見飭總理行營營務道員劉錦棠逐細查明具覆再會金順據實馳報以昭核實謹先

將大概情形附片陳明伏乞

聖鑒訓示謹

奏光緒二年四月十二日

欽奉 恩諭擬緩借洋款情形摺

奏為 奏奉 恩諭准撥部存巨款並蒙

飭催省關提前速解協款允由微臣酌籌借用洋款敬陳感激

下懷及擬緩借洋款情形恭摺馳陳仰祈

聖鑒事竊於三月十三日馳抵肅州後十六日准兵部遞到

軍機大臣 字寄光緒二年三月初一日奉

上諭

左宗棠出師塞外必須士飽馬騰方足以壯軍威而張撻伐各營將士踴躍前驅尤深廩念各省協解西征餉銀未能足數致有積欠口糧此次遠道進兵糧餉必須充裕左宗棠前議借洋款一千萬兩因耗息過多見請減借用四百萬兩係為節省經費顧全大局起見惟見當大舉深入酌發欠餉豫備行糧需款甚鉅恐不足以資周轉加恩著於戶部庫存四成洋稅項下撥給銀二百萬兩並准其借用洋款五百萬兩各省應解西征協餉提前撥解三百萬兩已足一千萬兩之數洋款如何籌借著左宗棠自行酌度奏明辦理欽此三月二十五日欽奉 寄諭部撥四成洋稅銀二百萬兩見擬分作四批由順天府接續領解交西征糧台分收轉解左宗棠軍營此項庫款該部請於西征協餉除提前之三百萬兩及兩次所借洋款劃還本利各銀若干外所餘本屬不多若令儘數解還即庫恐於該大臣軍營餉需仍屬不敷周轉著改於去歲議撥南北洋海防經費之四成洋稅內按年酌提一半將此次部撥二百萬兩陸續扣還所借洋款著左宗棠詳細核定各省協餉內某年某省應還借款若干分晰具奏各該將軍督撫即將該省協餉解過西征糧台及歸還借款本利銀兩各數目隨時咨報戶部查核倘不能解至八成以上仍著該部嚴參懲辦欽此跪誦再四感激涕零不能自己伏維出塞之師實緣局勢所在不得不然迥非黷武窮兵侈言遠略可比聖明洞矚邊方久遠情形 懇征軍積年苦況 特發德音允撥部存巨款 茲諭各營將士踴躍前驅尤深廩念而慮微臣減借洋款難資周轉 允僅款五百萬兩 今省酌度辦理 慈懷之曲體邊關將卒無微不至如此何以復加又慮部議各省提前協解三百萬兩外儘數解還庫款於臣

軍餉需難資周轉

飭改於洋防經費四成洋稅內按年扣還紓應協各省之力不强以難贍邊遠受餉

之軍不限以數

天恩高厚

聖慮精詳非但時局之幸臣軍之幸即各省督海關諸臣亦無不感幸同

深臣於欽奉

恩旨後次日大饗諸軍崇

朝廷德意令諸將校傳諭士卒歡聲雷動僉稱誓當竭力

圖報有口同聲臣詢諸統將從前發四個月鹽菜馬乾銀兩尚餘若干則庫有存者比以俄糧遲到先那
此項糧價銀十二萬五千兩分給裹帶均欣然喜出望外譚拔萃余虎恩劉錦棠率各起馬步出關時臣
於餞送後遣人覘之還報士飽馬騰整列齊行無落後者觀士氣之奇知而 皇仁之入人者深臣之請

借洋款也原因協餉積欠太鉅頻催固應計無復之而舉債用兵本泰西各國之常不足為異借本愈多
則期限愈遠取息愈薄尤於時局相宜所以擬定千萬者計得此大宗見餉除撥還歷年本息外協款尚
多贏餘庶意經營事之應辦者及時舉辦尚冀得所借手以濬利源非僅恃此款為一歲計也所以必
商之兩江者上海為中外商賈銀洋滙萃之所商借洋款恒必由之而現任督臣原有借定未用之款重
理舊說息耗不至頓增茲既室礙不行復奉 諭准借五百萬兩自行酌度敢不切實圖維以期周妥竊

計本年應得的餉除部款二百萬兩協款提前三百萬兩外各省尚有應解八成以上餘銀以之清還陝
鄂滬新借各款尚可存留四百數十萬兩計連閏十箇月內餉需得資周轉是本年不借洋款尚無不可
惟此後各省關協款衰旺未可預知而懸軍深入道遠費繁若無實餉接濟不堪設想近接上海轉運局
道員胡光墉等稟稱上年花旗普魯社兩國在海島開礮獲銀甚旺若與商借可期有成臣答以現奉

恩諭西征餉事目前尚資接濟如可由陝甘總督衙門出給印票無須借重兩江海關固為簡捷苟必須
海關出給印票則浙粵或容商量惟借款不許向英商議及即凖案速結亦不復向其商借並須預為說
明彼此成借不更關白英人惟借少則期近息重恐未能如台防十年八釐之輕耳臣之擬待來年始行
議借者一則遲借一年可省一年息耗一則明年議借隔年始還一期兩次彼時臣前借之三百萬兩本
息已悉數還清界限分明各省關協餉從後年撥還借款亦不至稍形迫促屆時臣當詳細指撥再候

飭部籌覆施行至陝甘誼均一體甘餉苦絀情形撫臣久已深悉譚鍾麟欽奉
諭旨查辦江蘇月協陝西一萬兩能否撥歸西征即飛絨抵臣無論陝省如何為難必當先其所急臣已緘復即由撫臣會銜具

奏

宸廑所有微臣感激下懷及籌辦情形縷細陳明伏乞

皇太后

皇上聖鑒

訓示施行謹

奏光緒二年四月十三日

上諭

左宗棠奏

字寄光緒二年四月二十六日奉

悉劉錦棠等軍現已分起前進據稱飭出關額爾慶額等軍輕進失利現擬緩借洋款各摺片覽奏均
新軍聲不振左宗棠當會同金順督飭將士乘其銳氣鼓行而進即率各營直搗賊巢現在士氣方
奏膚功朝廷實有厚望焉額爾慶額等襲攻瑪納斯城輕進失利馮桂增被賊拂入城內余已用
查明詳細情形據實具奏左宗棠以本年餉需尚資周轉現擬緩借洋款著該大臣隨時酌度辦理前據
額勒和布托倫布等先後奏報逆匪竄擾沙紫蓋等處現在大軍出關該逆鋌而走險窺伺北路自在意
中烏科等城境內未有重兵空虛可慮倘被其竄擾則勢成燎原聚殲不易著該大臣等揀派勁旅於北
路地方擇要扼紮以杜紛竄將此由六百里各諭令知之欽此

徐占彪丁憂留營片

再據分統蜀軍提督徐占彪稟親母徐李氏前由蜀來甘探視於本年三月二十二日在甘身故提督係
屬親子例應丁憂請即委員接統各營俾得扶柩回籍安葬守制前來臣維徐占彪關隴從戎戰績卓著
同治十一年進攻肅州聞訃丁父憂稟懇奔喪歸籍經臣奏奉 諭旨准令留營十二年肅城克復移防

甘州布置妥畢稟請歸籍終制並省其母時奉

命督辦新疆軍務復經慰留擬備出關之選徐占彪

之母聞其不能遽歸比營葬甫畢即親赴甘州探視其子蓋母子不相見者十有餘年矣每撫其子創痕
遍體輒為流涕然猶以立功圖報善撫士卒不必顧家為言茲在甘身故徐占彪悲泣陳辭請委員接統

蜀軍俾得扶輿歸葬臣維出關諸軍業經奏派分起啟行師期伊邇未便遽易統將因以古人墨經從戎金革無避之義示之仍飭徐占彪率所部出關俟軍務稍定再由臣給咨回籍以遂孝思而符定制謹

附片具陳乞

聖鑒訓示謹

奏光緒二年四月十三日

軍機大臣奉

旨知道了欽此

左文襄公奏稿續編卷六十二

出關諸軍進至古城留防要隘摺

奏為出關諸軍次第進至古城留駐巴里坤並籌防哈密安王要隘以遏奔竄而赴戎機恭摺仰祈 聖鑒事竊臣於四月十三日馳報資遣馬步各軍分起出關後疊據總理行營事務三品卿銜布政使銜法福陵阿巴圖魯西甯道劉錦棠稟報分統右軍記名提督新授漢中鎮總兵譚上連甫抵巴里坤謀報馬賊由布倫托海出紅柳峽僻逕繞過古城聞將折竄歸巢譚上連率所部急進比詞知賊騎二百餘已由南山竄向吐魯番西去譚上連率所部扼紮芟芟臺邑畢口大石頭三箇泉等處以護運道自率兩營進駐古城劉錦棠飭繼進馬步各軍均就哈密取存糧分起短運踰天山以抵巴里坤由巴里坤短運抵古城限閏五月底一併取齊候令進止自率輕騎赴濟木薩金順行營商定方略並赴前查察度地勢以便布置屯糧護運輾轉輾轉事宜詢知土回馬明等結壘之處為古牧地迤西而南數十里為烏魯木齊紅廟子官軍必先攻古牧地撤烏垣紅廟之藩籬乃可成搗穴犁巢之舉也濟木薩即愷安城距古城九十里由此而西七十里為三臺驛又西八十里為滋泥泉又西九十里為阜康縣城又七十里為黑溝驛又數十里至古牧地再進即可抵馬魯木齊矣濟木薩距城尚遠不能扼賊之吭劉錦棠會師進剿必先據要地為儲糧屯師之所然後左右伸縮可以有為阜康雖祇空城而地當賊衝從前馬賊之批科布多聞即由阜康駛出劉錦棠之注意於此一為進攻古牧地一為遏賊奔竄實非無見惟阜康駐軍僅能遮截逆賊出竄一路其西北瑪納斯出竄之路尤宜先事綢繆臣密飭劉錦棠於未進阜康之先與金順圖之現接劉錦棠稟閏五月初十日由巴里坤率所部數營進古城先赴濟木薩與金順會商一切即馳赴三臺滋泥泉阜康一帶相度布置計旬日內外所部各軍可齊抵古城當調其分起銜接而進約立秋之乃有戰事也劉錦棠所部分紮木壘河迤東護運各營擬調赴古城遺防各壘並宜填紮臣已調記名提督徐占彪率所部五營前往徐占彪自請併歸劉錦棠就近調遣臣已允之計此時已抵巴里坤接署延

紮其木壘河迤西一百三十餘里奇臺古城諸處則已咨商金順飭原防各營分段緝紮當可無虞其哈
密布置原有廣東提督張曜所部十二營及宋慶留哈勇丁八百名前以安西州有勇巴古路徑張曜分
營設防安西茲大軍前進巴古之閒有徐占彪一軍填紮以時局言宜厚哈密通吐魯番大路之防而巴
古通安王之小路若在所緩而臣之駐肅僅親兵一營馬隊二百騎亦無可再撥者劉典與臣書慮肅軍
之單不資分布而腹地漢回安謐分防各營尚有堪以應調者飭總兵徐萬福率所部兩營兩折赴肅臣
念督標兵丁久經訓練亦欲調具入營學戰以成其才除調隨營馬步兵三百員名赴肅此月內外均
可取齊擬俟到肅復酌增安王防營俾張曜所部悉赴哈密以絕旁竄而備將來軍鋒之選此籌策布置
大略也察看關內外征防諸軍和戢一心氣勢完固前敵軍糧長運短運均尚應手儲峙亦裕尚堪仰慰
宸懷謹據實馳陳伏乞
皇太后 皇上聖鑒訓示謹 奏
光緒二年六月初三日

覆陳杜賊紛竄摺

奏為遵 旨覆陳見籌杜賊紛竄情形仰祈 聖鑒事竊臣前奉 諭旨據額勒和布托倫布先後奏報

逆匪竄擾沙扎益等處見在大軍出關該逆銜而走險窺伺北路自在意中烏科等城境內未有重兵空
虛可慮倘被其竄擾則勢成燎原聚殲不易著該大臣等揀派勁旅於北路地方擇要扼紮以杜紛竄欽
此閏五月十一日欽奉 寄諭金順奏追剿北路竄匪情形並請飭烏科等城派兵扼紮要隘英廉奏同

匪竄擾塔境派隊防剿暨俄人解運軍糧被匪搶擄各摺片覽奏均悉賊匪由布倫托海竄出紅柳峽地
方經官軍跟蹤追剿賊由吐魯番仍回烏魯木齊金順見派兵駐紮木壘河三箇泉等處梭巡防剿但北
路沙磧遼闊無險可扼防不勝防且東路為大軍後路糧運所必經該逆雖已歸巢難保不乘間窺伺
順仍當嚴飭派出各軍認真防探遇賊即擊毋稍疏懈布倫托海迤西疊崙山地方竟有賊匪搶刦俄人
糧石之事該處地勢以烏魯木湖為梁海沙扎益為扼要之區金順擬將塔爾巴哈臺索倫等隊扼紮烏
魯木湖科布多蒙古等隊扼紮布倫托海或烏魯木海適中之地烏里雅蘇臺黑龍江等隊扼紮沙扎益藉